



RICE RATOONING



Mas mainam kung ang mga bagong suwi ay tumubo mula sa puno ng palay.

RTCruz

Ang *rice ratooning* o sagibo ay ang pagpapatubo ng bagong suwi o uhay mula sa mga pinaggapasan ng pangunahing tanim o *main crop* at maging sa *second crop* ng palay.

Sa *ratooning*, hindi na kailangang dumaan pa sa paghahanda ng lupa, pamumunla, at pagtatanim, at mas kaunting pataba ang kailangan kaya mas matipid. Bukod dito, sa tag-ulan at tag-araw, maaari ring umani ng katumbas sa 20 hanggang 60 porsyento ng *main crop*. Mas mabilis din itong anihin dahil 45-60 araw lang matapos i-*ratoon*, ay maaari nang anihin.



Mga dapat tandaan sa pagsasagawa ng *ratooning*:

- Kailangang malusog ang *main crop* o pangunahing tanim. Ang palayan na madamo, at tinamaan ng *tungro*, *blast*, at *stem borer* ang *main crop* ay hindi ipinapayong magsagawa ng *ratooning*.




Isinasagawa ang pagpapatubo ng *ratoon* o sangang-buko pagkatapos anihin ang palay dahil buhay pa ang mga pasyok o puno nito.

- Siguraduhing may sapat na mapagkukunan ng tubig.
- Gumamit ng barayting may kakayahang umani nang mataas, magandang magpatubo ng bagong suwi, at matibay sa sakit at peste.
- Panatiliing malinis ang palayan at mamasa-masa ang lupa 1 hanggang 2 linggo bago mag-ani ng *main crop* upang mapanatiling berde ang mga pasyok ng palay. Ang maberdeng puno ng palay ay maaaring makapagdulot ng magandang tindig ng palay at mataas na ani.
- Siguraduhing magsasagawa din ng *ratooning* ang mga kalapit-bukid upang maiwasang dumami ang peste sa inyong palayan.

Pamamaraan sa *ratooning*:

- Sa pag-aani, mag-iwan ng 5-15 sentimetro (sm) taas mula sa puno ng palay. Maaaring gumamit ng *combine* o *manual harvester* sa pagsasagawa nito.



- Kapag ang naiwan sa pinagputulan ng palay ay 5 sentimetro simula sa lupa, patubigan ang palayan kapag tumaas na ng 15 sentimetro ang *ratoon crop* para maiwasang mabulok ang pinaggapasan. Kapag ang pinagputulan naman ng palay ay 15 sentimetro simula sa lupa, patubigan ang palayan 3-5 araw matapos i-*ratoon*. Panatilihin ang 3-5 sentimetroong taas ng tubig sa tuwing magpapatubig mula pagsusuwi hanggang 1-2 linggo bago mag-ani.
- Magpataba ng 3 sakong urea (46-0-0) kung tag-araw at 2 sako kung tag-ulan sa isang ektarya sa loob ng isang linggo matapos i-*ratoon*, sa unang pagpapatubig sa palayan.
- Palagiang i-*monitor* ang pagtubo ng *ratoon*, klase, at dami ng peste at sakit upang makapag-desisyon kung paano pangangalagaan ang *ratoon* para hindi bumaba ang ani.
- Panatiliing basa ang palayan 1-2 linggo bago mag-ani. Maaari nang mag-ani kung 80-85% ng palay ay hinog na.